




*Senin, 12 Agustus 2024*

**Ogen : 1 Timotius 4:12**



**Usihen Kalak Si Tek**



Bagi mperidi kuda,' enda sada kuan-kuan i bas kalak karo. Ertina, si mperidi e leben litap asangken kudana. Ia leben seh ku lau, e maka irintakna kudana ku lau e. Kuan-kuanen enda rusur ipake i bas nehken pengajaren man orangtua bage pe anak si nguda. Ngatakensa kita lebe jadi usihen, ndalanken kai siniajarken kita. Maka iidah kalak perbahanenta si mehuli e banci ka iusihna bas geluhna.

Pengajaren Paulus man Timotius pe bage. Tupung Timotius nguda denga, ipersingetina gelah jadi usihen i bas kiningudanna. Ngerana mehamat man orang tua, man teman sebayana pe la mejarjar, adi man agi-agina ia metami. Lagu langkahna pe jadi usihen, la nggegei teman, mejingkat erdahin, bujur, ras sidebanna. Erkeleng ate man ise pe alu mperdiateken sekelewetna, nggit nampati alu la erperkiraan. I bas erkiniten pe tutus, dahikenna dahin perpulungen amin pe nguda denga. Iogena rusur Pustaka Si Badia, iukur-ukurina suari ras berngi. Idalankenna Kata e i bas kegeluhenna si teptep wari.

Tanggal 12 Agustus enda tepetna wari remaja Internasional. Teptep tahun enda irayaken guna mpersada pengidah anak remaja kerna persoalen si lit i bas doni enda dengen ngajuk anak remaja ertanggungjawab i bas mpekena-kenasa. Amin pe nguda denga tapi mbelin potensina emperdiateken lingkungan sekelewetna. Iajuk kita Moria ngidah potensi si lit i bas anak remajanta lako mpekena-kena lingkungan sekelewetna. La ia muat bagin i bas pinakit sosial masyarakat si genduari, mehamat ia man orang tua, kaka ras agina ia enggo ikut mpekena-kena doni enda.